

Nua va la Spagna cun Pedro Sánchez?

Ina midada malsegira

DA GUIU SOBIELA-CAANITZ

■ **L'emprim da zercladur ha il «Congreso de los Diputados» spagnol (350 mandats) approvà cun 180 vuschs la proposta da disfidanza da Pedro Sánchez Pérez-Castejón (*1972 a Madrid), parsura del «Partido socialista obrero español» (85 mandats).** Sánchez maina pia ina regenza da minoritad. El ha ristgà sia proposta da disfidanza pir pervi d'in grev cas da corrupziun en la partida da primminister Mariano Rajoy (*1955). Ussa sto Sánchez, sco successur da Rajoy, gidar cun sia nova regenza a schliar ils problems dal pajais (passa 46 milliuns olmas), oravant tut quel da la Catalogna (strusch otg milliuns olmas).

Ina giustia politisada

Igl è urgent da reformar la giustia spagnola. La «NZZ» dals 29 da matg rapporta manidlamain davart il derschader Pablo Llarena Conde (*1963 a Burgos en la regiun da 'Castilla y León'), commember del «Tribunal supremo» (p. 5). «Lez cumbatta cun in'energia da fier las persunalitads da l'antieriura regenza catalana da Carles Puigdemont [*1962]. El vul intradar in process a 23 politichers pervi da rebellium e malobedientscha civila u da deturnament da meds publics (...). Ils chastis spagnols èn draconics; la rebelliun po manar perfin a trenta onns arrest

(...). La politica influenzescha la giustia spagnola; quai vegn crititgà dal Cussegl da l'Europa (...): I saja urgent da depolitarisar il 'Consejo general del poder judicial' (...). A la fin da mars ha la Cumissiun da l'ONU per ils dretgs umans intimà a la regenza [da Rajoy] da garantir ils dretgs politics da las persunas arrestadas. Ins ha elegi pliras en il parlament catalan, ma i na pon betg entrar en funcziun. L'antieriur viceparsura Oriol Junqueras [*1969], sco er ils dus manaders Jordi Sánchez [*1964] e Jordi Cuixart [*1975], stattan en praschun dapi passa sis mais (...). Derschaders en Catalogna crititgeschan che Llarena cuntrafetschia a la presumziun d'innocenza e restrenschia ils dretgs dals accusads (...). Las organisaziuns per dretgs umans resguardan spezialmain la violenza duvrada da la polizia spagnola (...). Ils maletgs da policists che dattan schlops davant locals electorals catalans ed entaifer han girà il mund. Esteban Beltrán, schef da l'Amnesty International en Spagna, rapporta ch'ins examinechia 257 denunziats e ch'in tgisader haja pers la vesida (...). Ins n'ha suspendì naggin policist.» Primminister Sánchez vul modernisar la Spagna e s'entupar il pli spert pussaivel cun ses collega da Catalogna Quim Torra (*1962). Poel promover la convivenza da pievels differents en il pajais? Cura cloma el las elecziuns legislativas annunziadas? Quai ves'ins lura.